



Cu HOPI positivismo & Cu HOPI gradicimento

Y ASINA nos a drenta un otro aña nobo, cu algun di nos famianan sufriendo un kebrante di salud, pero cu hopi positivismo y gradicimento na nos humilde curason cu nos t'ey y cu nos por a wak un otro aña mas. Tawata un cambio di aña diferente, cu otro prioridadnan cu a haci nan entrada. Mientras cu e klapchinan y pagaranan tawata zona pafo, paden di mi hopi

pensamento pa evalua con mi aña a bay, y mi deseonan pa 2015. Manera mayoria hende, ta brinda riba salud prome, pasobra sin salud no tin nada of no por haci nada. Ta cuanto hende ta desea di por ta riba pia, canando y yudando nan mes en bes di ta riba cama. Ta cuanto hende ta desea di por tin cuminda riba mesa tur dia y asina por sigui menciona. Bida ta precioso

y bida ta un tesoro den cual nos cada un por sigui descubri e maravianan den su existencia yena cu amor, pasion, comprension, alegria y sabiduria, just pa menciona algun. Mi a comprende tambe cu den of durante e dianan di fiesta un of mas persona a fayece pero cu no a wordo publica den corant, pasobra no tabatatin corant durante e dianan ey di fiesta y asina a despedi den circulonan familiar mas tanto di nan sernan stima. Cu alegria a anuncia e yegada di e prome baby di aña den nos medianan di comunicacion, e mesun alegria cu e otro mayornan tambe a sinti cu

nacemento di nan yiuchinan den e prome simannan di 2015. Mi kier a tuma e oportunidad un rato pa gradici Sr. Y Sra. Toribio Gomez pa e dushi galiña, calacuna, ham horna y salada di batata cu nan cushina di 5 strea a cushina pa nos. Lady Ruth no ta asina experto den cushina, pero a gosa tambe di e ayacanan cu nos por a cumpra for di e suegra di un colega di trabao di mi casa. E dushi bolo traha pa sra. Lily Arends cu tawata asina dushi!

Por haci peticion durante henter aña pa esakinan, pero nan ta baha mas sabroso den e temporada di fin di aña, meymey di tur e adornonan paden y pafo di cas, e luznan di tur color, y e dushi holo di e kerstboom. Nos mini kerstboom e aña aki, pasobra esey tawata mi deseo. No tabatatin mester un kerstboom cu ta mishi dak, mi kier a laga hopi espacio pa e angelnan por baila riba e topi.... hahahhaahhhhaa.....

Y si, ainda mi mata di Pasco, esun cu blachinan cora ta bibo den mi comedor riba cashi, esun cu Sr. Y Sra. Edgard Kelboom nan a regalami, pa mi poema y bunita dedicacion na nan academia musical di Harpa y cuarta cu nan di 20 aniversario cumpli prome cu fin di aña pasa.

Mi positivismo ta sigui guiami cu hopi gradicimento na mi humilde curason, cu claro, tambe ta yen di orguyo pa



tur e logronan di mi cumpli aña pasa y pa mi famia bendiciona. Y cu mas gradicimento pa cu e mehoracion di e salud di mi dushi hendenan y nos mesun salud, cu dia pa dia ta mas miho !Tja, ningun hende ta gusta bira malo, haya un griep of virus andando. Y cu bon cuidu y atencion, cu hopi amor y cariño nos tur por sinti miho sigur. Bebe hopi awa, y come saludabel, mas fruta y berdura y un of otro vitamina. Nos ta sigui acepta cada dia como un regalo precioso di gracia y bondad cu amor di mi Creador di Amor. Y nos ta sigui disfruta di nos bida lo miho cu ta posibel, sin haci nada di mas, sin abusa, sin malgasta nos talentonan y donnan, pero sigui padilanti den fe y positivismo. Nos niun ta aki den e mundo material aki pa semper y ta bon pa biba na paz cu bo mes y cu otro nan rond di bo. Un biaha mas, mi miho deseonan pa un Feliz 2015.

